

Nurianne Helder:

“Proyecto Hoben y Talentoso a pone mi sinti e compromiso cu e comunidad di Aruba.”

ORANJESTAD - Ningun meta ta incansabel si bo pone bo curason na dje. For di chikito nos tur tin un soño cu nos ta anhela na dje pero pa haci e soño tan anhela aki bira un realidad, e lo costa nos un gran cantidad di determinacion, dedicacion, disciplina propio y esfuerzo.

Cu otro palabra den bida ora bo kier logra algo esaki no lo bay sin su sacrificio bo tin cu lucha y traha duro pa logra esaki. Celebrando su di tres edicion, e proyecto di hobentud Hoben y Talentoso a reconoce numeroso hoben di Aruba cu a destaca den diferente area manera innovacion, educacion, musica, arte, baile y deporte.

Pa Nurianne e tabata un elogio pa a keda reconoci den e proyecto Hoben y Talentoso. Segun Nurianne; “E la nifica hopi pa mi, e la trece hopi disciplina, hopi determinacion ya cu e enfoke y “spotlight” tabata riba mi persona. E tabata un compromiso no solamente cu mi mes pero tambe cu e comunidad di Aruba.

Mi ta un persona cu semper a traha pa logra tur mi metanan cu mi a pone pa mi mes



y mas meta ta wordo agrega cada aña.” Pero no ta tur ora cosnan ta bay manera desea. Den bida tin algun momento cu nos ta pasa den duro, ta mescos cu nan a benta nos den un lama bruto y nos mes tin cu purba sali for di esaki. Un momento asina ki Nurianne tambe a experiencia e aña aki.

“Den tur nos ocupacion pa logra nos metanan, tin biaha nos ta lubida cu nos curpa ta un instrumento hopi importante pa locual nos kier logra den bida, anto asina hopi cos a sucede y ainda mi ta purba procesa loka a pasa cu mi persona. E ta un realidad awo y mi tin cu biba cun’e, pero

esaki no lo stroba mi di logra tur mi metanan poni mi dilanti. Al contrario awo mi tin mas meta y esaki lo haci ami mas fuerte pa mi traha y bay mas padilanti.” Algun luna atras e hoben Nurianne Helder a wordo diagnostica cu Diabetes tipo 1 y awo pa prome biaha e lo bay duna su testimonio y conta su storia dilanti publico. “Mi tin sigur cu tin mas hobennan ey for cu a pasa den situacion fastioso mescos cu mi, pero no laga esaki stroba bo logra bo metanan. E ta un forma pa surpasa



tur obstaculo cu ta keda confronta cun’e. Nos tur ta bay tin esey den nos bida, pero nos tin cu sigui padilanti no matter what”, Nurianne a finalisa bisando. E hoben Nurianne Helder tambe lo forma parti di e show dia 4 di november proximo durante di entrega di e “Award Book Hoben y Talentoso 2015” den Cas di Cultura. Pa esunnan cu kier sa un poco mas riba e proyecto Hoben y Talentoso por subi e facebook page na e link [facebook.com/hoben-ytalentoso](https://www.facebook.com/hoben-ytalentoso) □